



嵩洛訪碑日記

嵩洛多古刻每遣工搨致未得善本嘗思親歷其間別
石捫苔盡力求之嘉慶改元之秋攜搨工二人自蘭陽
渡河驅車徑往輪蹄小住輒問貞珉得即極摹篝燈展
勘不減與古賢晤對也

錢唐黃易小松



九月初六日祥符相國寺搨元祐經幢市間得漢鏡文
曰宜君樂樂未央大富昌余苦肝患醫者云宜散鬱乃
愈讀此憬然又購唐鏡一古幣四漢印二
初七日至鄭州開元寺殿圮重葺小構僅蔽風雨存兩

石佛一天授二年侯文行造彌勒像一開元八年王元
度造蒲臺像殿後尊勝經幢中和五年僧祖愿書經篆
額天成二年重脩幢上層四面鑲佛邊闌復刻畫像題
字有天福五年僧敬璋及上柱國楊璋等名秋陽曝紙
施榻殊艱寺傍東里書院學徒見獵心喜咸來按紙助
力俄頃榻全惟浮圖北面窗壁對嵌二石疑亦古刻高
八九丈莫能致也

初八日午抵棗陽漢聞喜長韓仁銘在縣治儀門內西
向露立頂作垂虹足半入土剔至碑座其下與碑陰兩
側俱無字唐景龍御書賜縣令盧正道勅陰刻盧公清

德頌額作佛像旁有行書二行碑側唐天寶八載盧重
華貞元五年劉士陵貞元十五年關士約貞元十八年
王皋等題字宋天禧五年王鑒記各稱一紙申刻至汜
水縣東關登高阜至等慈寺齊武平五年造像碑在後
殿憲壁間唐高宗紀功之頌顏思古等慈寺碑在寺外
高原紀功頌碑陰之上有從官臣勅等字數行高不可
榻惟榻得下層開元十三年史敘書御製途次成皋詩
及崇寧四年王評題名棗陽以西崇崗壁立車行狹道
間僅容一騎居人穴土為室溝深路峻俯視悚然
初九日五鼓踰虎牢關高下數里車陟高危駭人心目

頂上關帝廟有碑昏夜莫辨北趨坦途望黃河如帶
循芒山而西過鞏縣渡洛水問淨土石窟寺紆道難達
不及訪碑行洛岸坡石間達偃師境近城見王輔嗣墓
元吳炳八分碑立道旁晚抵縣署王大令秋勝歡然道
故言武君虛谷在魯山修志約俟余至必歸馳書趣之
假余竹輿命役導引次早赴嵩山
初十日出偃師南門山田多井轆轤相望久安耕鑿童
叟熙熙言今年麥稻棉花倍收數十年所未有也飯府
店鋪望嵩少諸峯愈近愈翠登嵒嶠嶺口入登封境即古
之輟轅關峭坡盤曲數夫緯輿而上回視鞏洛山川歷

歷可數及巔達縣城山岡起伏悉皆坦途始知此境已
在雲霄之上經行巖谷間曲澗奇峯應接不暇薄暮至
少林寺登千佛殿拜達摩血影石觀緊那羅王藤像威
巖若生旁銘銅鐵二像不及也寺當少室之陰列如屏
幃少頃月上憶施愚山翠屏橫少室明月正中峯句至
此始信詩境之真篝燈尋碑搨得天平二年僧洪寶武
平元年馮暉賓二巨碑永興等四面造像碑天保八年
僧靜明造像碑觀音大士像大安己巳邵公悅疏餘碑
記明再搨山僧夜起誦經誦畢習手搏山中故事日以
為常余心弗好高卧不問也

十一日過邢家鋪對少室之御砦數峯攢立如蓮花捫少室石闕篆書畫像雖極剝落石質堅剛自然樸古篆銘叢林芝口綿之上列有字前亦有字闕側有字三行叢林之下隔石二列露一伊字東闕題名李客之下有直格隱隱有字皆昔人所未見四面多作人物鳥獸楮峻所圖弗確也擬遊會善寺依僧而息登封趙大令使者來迎遂館城中書院

十二日大風不能出遊添募搨工廣募少林諸碑先購得天保八年碑樓寺碑齊武平年宋始興碑

十三日風定乘竹兜出城五里遊嵩陽書院遙見門外

唐天寶碑高如坊表雕刻精工徐季海分書整潔余藏本少碑額命工補全碑側明人題刻碑陰中間宋熙寧時張琬宣和間盧漢傑題名二段進書院瞻大將軍柏大七人圍扶疎古茂南面未理潔白余題名一行于上以志欣幸二將軍柏大三人圍亦蒼鬱可觀庭心紫薇一本殊秀雅廊下獲文潞公張杲王邳題名三石東墻得元符二年宋傅小楷書真武經極工柏下舊有石柱宋人題名求之弗獲行三四里至崇福宮殿塑三清像及王天君趙元壇三像極雄偉宋金時所塑也殿堦下邱長春海市詩及二元碑壁間口川仙裔題名爐座宋

景祐殘刻東行數十步觀啟母闕西闕簷石小損畫像亦多向未盡拓銘詞開母廟興一行之前有川郡陽一行又二月一行堂谿典請兩銘之首維時二字其言維何下有嘉字皆向所未見其上里許觀啟母石高三丈廣如之絕類吾杭西湖之壽星石正面平削西若廣廈石縫嵌錢蓋村人好事者所為循山行七八里踰小峯嶺至中嶽廟樓殿輝煌氣象雄大太室石闕離廟百步砌石整齊畫像亦多上層雖鑿如新二千餘年劃痕猶歷歷可辨亦一奇也廟前兩石人冠冕執笏比曲阜魯恭王墓前二石人較小制作皆同武虛谷疑身間刻字

曹囑余遣工別土細驗搨其形以歸信為無字矣茲余親辨東石人冠頂上一馬字深刻極古真漢人八分兩石人之背有孔八九鎔鐵尚存或當時門闕嵌置之故進西華門宋金四巨碑對立峻極門外東階見魏寇謙之等碑已有搨本惟唐咸通六年脩廟碑并碑側題名未有大殿前兩鐵獅金正大年鑄鐵鑪元至元年鑄大門內守庫鐵人四內二人有治平熙寧等款四段十四日出南門過嶺來山陟崇岡望嵩頂見太室正峯形勢厚大其右少室宛若拱侍至告成周公廟觀測景日表登觀星臺臺後平鋪石槽漏水以算日影東原有

斷碑首曰大唐洛州告成等字漫漶難讀稍東龍華廢寺斷石幢二俱刻佛經半已漫滅行數里循平洛澗至石淙怪石凌空面面靈瘦澗水奔流深潭澄碧誠奇觀也武后遊石淙時北崖刻詩南崖刻序下臨潭水搨工架木求之北崖詩刻之上石穿數孔昔年架屋之迹也后嘗避暑於此當年構造自極工妙今惟山空水深奇峯滿壑而已余至此聽泉捫石想盧鴻隱居之金碧潭雲錦淙諸勝定亦如此惜徑荒難達諸勝莫可蹤跡矣石淙題刻不少余尋見宋人范忠宣數種他多近人所題磴壁危滑不能駐足遍視為可惜也

十五日出北門十里積翠峯下遊會善寺門外銀杏大可四圍古柏亦相等蒼茂可愛入寺僅見東廊唐大厯二年會善寺碑戒壇勅牒問他碑山僧導至西原戒壇舊址見東魏天平二年嵩陽寺倫統碑造像精工兩面俱刻向獲搨本止下層八分書一段餘皆未搨其上篆額與諸佛名刻字工人弗顧也戒壇護法石像碎卧荒草間唐開元時道安禪師殘碑半埋土壤惟淨藏禪師塔銘尚嵌塔身巍然西峙元僧數塔在寺東碑刻封號極崇大也

十六日再遊中岳廟古柏廿餘比曲阜孔廟之柏大而

矮東一柏最大過於嵩陽書院之二將軍殿後偃柏二亦古峭惜萎其一榻唐宋元諸碑鐵人鐵獅鐵爐諸款再觀太室闕題名其上問盧嚴寺及嵩頂徑窄路荒前年有顯者欲往治途半月始達余無濟勝之具遙瞻山翠嘆息而已

十七日遊老君洞大風揚沙至谷口而返再遊嵩陽書院移文潞公張杲王邳題名三石於東偏小室囑登封趙大令嵌置壁間明登封令傅君梅作存古書院收諸寺殘石置此今改文昌宮余往捫索得宋金元石刻九內橫石刻天王神鬼像極工有吳道子李龍眠筆致必

宋金名手之作趙開闕題達摩相諸刻亦佳亟榻之景侍郎冬暘說嵩云戒壇寺石幢有唐宋人題字傅君梅初移署中旋載歸邢臺故不復存余思傅君移置諸石保殘守闕良費苦心何嵩境有名石幢反移歸私第理或未然考畿輔志乘邢境並無此幢景說未可盡信余訪詢登邑榻工言傳聞幢已斷缺恐官追問久已埋藏寺僧云數十年前重脩諸寺舊碑大半移埋此說為近也飯趙君官署趙名時號及庵萊陽進士清勤為政登人愛之幕中胡君赤霞賢而才皆乞余書笑而應之十八日早將行榻工攜少林諸碑至琳瑯滿目相載而

歸趙令馬尉郭外作別少室山光清翠可戀山高風大
登陟良苦臧獲輩有憂色望永泰嵩麓法王諸寺不及
留覽下輟轅至緱嶺山不高而清曠幽遠登仙君廟憑
虛四望二室諸峯環繞當面昔人謂是仙境良非虛語
塔東武后昇仙太子碑高大工緻今猶完整碑側宋盧
功裔題名甚工塔西宋謝絳脩大殿碑搨得碑側濟南
李格非等題名十一段碑陰亦有宋人題名晚不及搨
宿府店鋪

十九日至偃師虛谷已還飯齋中縱觀金石搨本及古
玉圭晉劉韜碣石贈余搨本數十種同至學宮明倫堂
觀所收魏齊至宋元諸石刻是虛谷數十年所致也補
搨數種秋暎先至洛陽書來約余同虛谷往洛

二十日虛谷攜子愚溪約余赴洛飯義井鋪稍北平等
寺舊址齊碑四通並立半為土掩地名四里碑安邑宋
芝山誤聞此是劉寬碑今乃釋然煩秋暎遣人剔出搨
之過白馬寺大門內至順鉅碑書甚工宋蘇易簡碑已
碎大殿前魏造像幢後殿唐麟德年蘇寶才造像壁間
晉開運造像宋摩騰入漢靈異記元至正詩刻後殿元
貞鐵鐘一塔上寧遠將軍造像殘石余與虛谷喬梓尋
金時方塔前列金碑一塔間舊多碎碑今盡失之望雙

碑四一是魏王墓碑一是唐狄府君碑府君梁公父也
虛谷云昔狄氏後賢訪問祖墓得洛城道旁一石題曰
唐忠臣狄梁公墓遂以墓穴在是封鬣表之不知雙碑
四為確也過二十里鋪廟中見五代羅周敬碑道旁神
龜二年造像刻石晚抵洛陽與秋勝虛谷翦燭快談新
安鄒大令霞城能文嗜古亦來訂交
二十一日同秋勝及虛谷喬梓出南郭渡洛河謁
忠義陵極崇麗遊龍門賓陽諸洞觀諸佛像莊嚴博大
旁多刻字齊洛州老人佛碑唐岑文本三龕記俱刻洞
外石壁僧言三龕記舊有褚遂良款石片碎落昔藏寺

中旋失去老衲謝草猶見之飯臨河小閣望香山如圖
畫飯畢循山而南石壁鑿洞不能數計登老君洞觀魏
齊諸刻洞上老翁王樵夫居之自言年九十有三或以
為仙蔣學士獨敬禮之夕陽已西不及至香山而返
二十二日為虛谷先人吏部公書神道碑及魯山令董
君書巢索書聯額書畢偕虛谷步縣學東看魏大覺寺
碑惜文已磨盡刻明人修廟記止存篆額欲訪董湘涵
友漢草堂聞其孫析居不果從其族人購得董氏所藏
孔和碑陳德碑及太和十二年宕昌公造三級浮圖碑
唐張嘉祐墓誌盧杞書其父碑十數種磚塔銘半幅石

鼓文九紙皆精本也

二十三日秋勝虛谷先返偃余宿龍門鎮視工人廣搨
諸刻佛洞多在山半虛谷欲登最高之九間殿看張九
齡書牛氏像龕刻力憊未果余竟登之大盧舍那佛像
高八丈五尺石磴宏敞唐奉先寺基也大歷十年造盧
舍那大像碑內侍省功德碑牛氏像龕記魏國公殘碑
宋丁裕題字俱刻石壁

二十四日渡伊河遊香山寺及巔眺龍門山石壁危峭
鑿佛如林盧舍那大像坐半山中別有景象寺無古刻
惟唐少傅粟主 國朝湯西崖少宰 右曹 配食馬堂

懸西崖書石樓風月小額緣山尋碑佛屋刻武后時書
經極工唐人大足等年造像銘宋王曙詩真宗龍門銘
歸寓鄒大令霞城遺蒼頭來索書楹帖為秋勝作龍門
覽古圖長卷

二十五日視工人搨龍門諸刻山僧古涵精摹搨亦來
助力僧知伊闕洞頂小龕有開元刻字猱升而上得一
紙乃邱悅贊利涉書向所未見非此僧莫能致也
二十六日欲行雨阻工人冒雨搨碑持來紙濕余為慰
乾得香山諸刻及唐人党睦辛祕等題名惟少大足一
刻龍門石洞內見頂刻大唐永隆等字圍轉巨書老君

洞頂之刻幾遍架木高危不能搨取嘆息而已住龍門
六日搨碑三百餘種得漢鏡文曰九子明鏡世異寡雙
服者卿公又長宜子孫鏡一位至三公鏡二
二十七日雨止成行行後望龍門諸山在雲霧間荒原
翠碧宛若春郊伊水灘聲蕩滌塵俗午過白馬寺搨諸
造像鏡銘至義井鋪尋四齋碑業田者畚鍤出之不肯
受值索余書而去晚至偃師署秋勝齋中藝菊四列與
武虛谷叔姪及嵩縣朱大令持螯小酌劇談風雅幕中
山陰金臨川為余寫墨梅甚淡雅勝童二樹多矣座中
人索書小聯盡應之

二十八日秋勝又招友賞菊虛谷見贈岳麓寺碑額碑
陰并唐李吉甫等永興石室題名超化寺元遺山王黃
華等題名搨本十數種秋勝惠昇仙太子碑及靈巖山
人詩吳會英才集等書

二十九日別秋勝東歸出城十里登芒山望宋會聖宮
碑南見太室少室諸峯在層雲之上北眺太行隔河雄
峙山腰紅黃色疑秋葉也上下坡磴遠於虎牢關至馬
候午飯相傳是伯夷叔齊扣馬處渡孟津黃河宿孟縣
城南
三十日早步學宮忠義祠魏唐宋元諸石刻嵌置工整

署觀孫雪居雙柏園董香光懷新堂圖甚工妙硯山之
弟靜山孝廉出觀明人尺牘宋仲溫姚廣孝于忠肅諸
公數十家皆精美見題跋知為吾友江秋史舊藏良朋
仙去物亦雲烟對之慨然署多奇石為硯山作石供山
房扁知楚氛稍定弇山師破當陽邀賜世職江南豐
縣決河計日可塞也
初五日過衛郡命工搨城隍廟元時鐵鐘得張稚恭山
水立幅程穆倩題跋漳州經幢搨本宿滑縣老牛店
初六日大風至東明郭外宿展觀晉刻齊太公斷碑粘
連接縫

初七日抵曹郡西郭外見穹碑驗是元脩濟瀆廟碑商
琥撰書攷論濟水源流歷朝遷徙之故文極該博書復
清挺上有明侍郎王永和題跋命工人搨得一紙

初八日出曹郡過滕令周君護兵赴豫晚住鉅野龍垆
集搨視祥符所得唐鏡文曰仙山並照智水齋名花朝
艷采月夜流明龍盤五瑞鸞舞雙情傳聞仁壽始驗銷
兵凡八言銷兵既兆楚賊即平可慶也

初九日過鉅野縣在學宮明倫堂見元統年謝端書朱
子語橫石有瘞鶴銘風格將來搨之晚宿嘉祥縣于大
令來見知汶令葉允忽化才而不祿可傷也

初十日抵濟計嵩洛搨碑四百餘得舊搨本四十餘以
副本分贈鐵橋梅村鏡古諸君子大快事也
蘇州人言陰元類此焚燬碑下何處也
嵩洛訪碑日記
西華水見習如健文
前亦賣眼點香

右嵩洛訪碑日記一卷國朝黃易撰索是書為亡友
黃石溪明經鈔存本無撰人名氏相傳為黃小松筆云
考翁覃溪復初齋文集黃秋庵得碑十二圖序稱其方
欲搜討嵩山三闕上下巖洞秘文雲水蒼鬱靈境雪然
矣又常作嵩洛訪碑圖云云又黃秋庵傳亦有南游嵩
洛語又小松筮仕濟寧而是書未有初十日抵濟語又
覃溪所撰傳稱李鐵橋亦以金石之學世其家與君最
契而是書有以副本分贈鐵橋等諸君子語傳又稱鐫
諸石者安邑宋葆淳而是書復有安邑宋芝山誤聞此
是劉寬碑今乃釋然語芝山葆淳號也又小松工書而

是書屢言為人書碑版聯額又墨香居畫識稱其寫山水得北苑巨然正法眼藏而是書自紀為秋旆作龍門覽古長卷又小松錢唐人而是書有絕類吾杭西湖之壽星石語又阮文達小滄浪筆談稱小松嘗作得碑十二圖及嵩洛泰岱訪碑圖以秀逸之筆傳邃古之情得未曾有則小松果從嵩洛訪碑且作圖矣定是書為所撰似非臆斷小松名易字大易號秋庵其父樹穀號松石故又號小松官至兗州府運河同知護運河兵備道精於金石六書之學著有小蓬萊閣金石文字及小蓬萊閣碑目等書蒲褐山房詩話稱其官濟寧凡嘉祥金

鄉魚臺間漢碑悉搜而出之而武氏祠堂畫像尤多所見漢石經及范式三公山諸碑皆雙鉤以行於世則其生平嗜古隨處搜羅而是書則訪碑嵩洛時所記也孫淵如寰宇訪碑錄自序稱又值同世通人名士搜奇好異郵示所獲擴其見聞若今王少寇昶錢少詹大昕阮撫部元等而小松與焉又寰宇訪碑錄所載如在河南洛陽熹平石經尚書論語殘字在河南南陽圍令趙君等碑俱註已佚則非此行所得而亦謂浙江錢唐黃氏藏本其搜討諒非旬月矣是書卷帙無多殆未經刊刻余恐其不傳也亟付梓焉咸豐甲寅上巳後四日寒食

節南海伍崇曜跋

海本其魁陸結非位自其長書長神無及故未幾何
書報於越已於限非此於於於於於於於於於於於於
我朝嘉平以懸尚書儲儲儲儲儲儲儲儲儲儲儲儲儲儲
與將天書而山以與焉又察平於於於於於於於於於於
與往亦前蘇蘇蘇蘇蘇蘇蘇蘇蘇蘇蘇蘇蘇蘇蘇蘇蘇蘇
無以察平於於於於於於於於於於於於於於於於於於
至平於於於於於於於於於於於於於於於於於於於於
同治辛未六月十四十五兩日依身雅堂叢書本抄汪劉



